

FAKTOR PENYUCIAN LEMBU DALAM AGAMA HINDU: KAJIAN TINJAUAN LITERATUR SISTEMATIK

Nurhanisah Senin, Nazneen Ismail & Nurzatil Ismah Azizan
nurhanisah@kuis.edu.my

Fakulti Pengajian Peradaban Islam
Kolej Universiti Islam Antarabangsa Selangor (KUIS)

Lembu merupakan haiwan yang dianggap suci dalam agama Hindu, Jaina, Buddha dan Zoroaster atas faktor-faktor yang berbeza. Kertas kerja ini akan membincangkan kedudukan lembu dalam ajaran Hindu menerusi perbincangan daripada literatur-literatur lepas. Penghargaan masyarakat Hindu terhadap lembu dimanifestasikan menerusi sambutan hari Ponggal iaitu pesta menuai pada hari kedua daripada perayaan tersebut dikhususkan untuk memberi penghargaan kepada lembu peliharaan mereka. Justeru, penganut Hindu dilarang membunuh lembu serta memakan daging lembu kerana ianya dianggap sebagai haiwan yang suci. Kajian ini menggunakan metode analisis kandungan dengan kaedah Systematic Literature Review (SLR). Analisis sistematik memfokuskan kepada faktor penyucian lembu dalam kepercayaan masyarakat Hindu. Kajian mendapati penyucian lembu berkait rapat dengan tiga faktor utama iaitu agama, ekonomi dan politik. Pada tahap awal, penyucian lembu dalam masyarakat Hindu lebih bersifat agama kerana terkesan dengan konsep Ahimsa yang dibawa oleh agama Jaina. Ia kemudian berkait dengan ekonomi apabila lembu dipelihara daripada dibunuh kerana manfaatnya yang banyak kepada manusia sehingga ia dianggap sebagai ibu kepada manusia. Adapun pada zaman ini penyucian lembu lebih bersifat politikal dalam mempertahankan status quo masyarakat Hindu. Tuntasnya, penyucian lembu pada setiap zaman dikaitkan dengan doktrin pegangan Hindu yang menganggap lembu sebagai ibu yang setaraf dengan dewa hasil daripada bakti yang dicurahkan lembu kepada manusia.

Kata kunci: Hindu, Lembu, Faktor penyucian, SLR

1.0 Pendahuluan

Permulaan amalan penyucian lembu oleh masyarakat Hindu dapat dikaitkan dengan aspek ekonomi dan pertanian masyarakat India. Pada zaman pra-Hindu di India atau dikenali sebagai zaman Veda kuno, lembu disembelih dan dimakan dan merupakan salah satu makanan terpenting yang ditawarkan kepada para dewa dan dimakan oleh peserta-peserta dalam upacara agama Hindu (Batra, S. 1981) Pada zaman Hindu klasik, lembu tidak dianggap sebagai haiwan yang istimewa mahupun suci seperti yang difahami dalam konteks hari ini (Jha 2002). Seiring dengan peredaran masa, golongan Brahmin menjadi kasta yang bertanggungjawab terhadap perlindungan binatang ternak daripada sebarang penyembelihan.

Sudah difahami secara meluas bahawa antara ajaran utama dalam Hindu adalah penyucian lembu di kalangan masyarakatnya. Lembu dianggap sebagai binatang yang suci, maka menyembelih dan memakannya adalah tindakan yang tidak dapat diterima (Stephen K. Sanderson, 2011). Dengan membunuh, seseorang itu akan menghalang kitaran semula jadi kelahiran dan kematian haiwan itu, dan oleh sebab yang demikian, haiwan itu harus dilahirkan semula dalam bentuk yang sama dengan kematiannya yang mana ia adalah tidak wajar.

Dalam agama Hindu juga, lembu merupakan haiwan yang dihormati dan diagungkan serta dimuliakan oleh masyarakat Hindu kerana lembu dianggap sebagai tempat bersemayam bagi para dewa-dewi. Lembu merupakan binatang pilihan para dewa-dewi kerana lembu merupakan binatang yang memberikan kehidupan pada alam semesta. Para pengikut Hindu menghargai, menghormati dan melindungi lembu sebagai jalan bakti kepada Tuhan. Dengan jalan bakti tersebut maka mereka akan mendapatkan kesempurnaan dalam hidup mereka. Mereka mempersembahkan doa-doa serta pujian untuk lembu kerana telah memberikan kehidupan dan kemakmuran (J. Hsu, Minna. 2012. Oleh itu, kertas kerja ini akan membincangkan secara tuntas faktor-faktor penyucian lembu dalam ajaran Hindu menerusi tinjauan sistematik literatur.

2.0 Metodologi

Kajian ini mengaplikasi reka bentuk kajian tinjauan literatur sistematik. Perbincangan akan dibahagikan kepada tiga proses utama seperti yang dilakukan oleh Yu Xiao dan Maria Watson (2017) iaitu melalui tahap identifikasi, pemeriksaan, kelayakan dan diikuti dengan analisis ringkasan literatur.

2.1 Identifikasi

Dalam penulisan tinjauan sistematik literatur, proses pertama adalah mencari dan memastikan kata kunci yang bertepatan dengan tajuk yang dibincangkan. Bagi mengenalpasti kata kunci yang sesuai, semakan dilakukan menerusi kamus, tesaurus dan kajian-kajian lepas. Kajian ini menggunakan tiga kata kunci iaitu *holy cow*, *sacred cow* dan *cow protection*. Pencarian dilakukan dalam dua pangkalan data iaitu Scopus dan Dimension. Hasil daripada pangkalan data Scopus, terdapat 7 artikel yang berkaitan dengan tajuk kajian manakala pangkalan data Dimension menunjukkan terdapat 9 artikel yang berkaitan.


2.2 Pemeriksaan

Tujuan utama pemeriksaan adalah untuk mengeluarkan artikel-artikel yang sama mahupun artikel yang tidak berkaitan secara langsung dengan tajuk kajian. Kriteria utama adalah untuk mencari artikel yang membincangkan tentang faktor penyucian lembu dalam agama Hindu. Daripada 16 artikel yang diperolehi terdapat artikel-artikel yang merupakan ulasan buku. Hasil daripada proses pemeriksaan, menunjukkan terdapat tiga artikel yang sama dan tidak memenuhi kriteria.

2.3 Kelayakan

Dalam proses untuk pemeriksaan kelayakan, 13 artikel diperiksa dengan lebih teliti dengan melihat abstrak serta kertas kerja penuh. Sebanyak 8 artikel dikeluarkan pada fasa ini kerana

tidak memenuhi kriteria kelayakan. Antara kriteria utama adalah, artikel tersebut perlulah membincangkan tentang faktor penyucian dalam agama Hindu. Artikel-artikel yang dikeluarkan daripada proses ini kebanyakannya membincangkan secara fokus berkenaan aspek kesihatan pemakanan, larangan memakan daging, gerakan memelihara lembu dan kaitan gerakan tersebut dengan politik politik tanpa perbincangan tentang faktor penyucian lembu dalam ajaran Hindu. Artikel-artikel yang dimasukkan hanyalah artikel yang menyentuh tentang faktor-faktor penyucian lembu dalam ajaran Hindu.



2.4 Ringkasan Literatur

No.	Penulis (Tahun)	Kata kunci	Dapatan
1	Aparna Parikh & Clara Miller (2019)	<i>Animal symbolism, surveillance, Dalit, Muslim, India</i>	Kesan daripada pengaruh ajaran Buddha.
2	Uttara Kennedy, Arvind Sharma & Clive J. C. Philips (2018)	<i>Cow, shelter, gaushala, welfare, India, dairy, slaughter</i>	Kesan daripada tamadun Mesopotamia yang mempengaruhi penduduk di lembah Indus. Diikuti dengan penegasan peranan lembu dalam Veda dan doktrin <i>ahimsa</i> dalam ajaran Buddha.
3	Govindasamy Agoramoorthy & Minna J. Hsu (2012)	<i>Hinduism, cow protection, religion, culture, economy, society, India</i>	Lembu dianggap sebagai ibu yang memberikan manfaat yang besar buat alam. Lembu dianggap sebagai dewi. Penyucian lembu juga dipengaruhi dengan faktor ekonomi.
4	Frank J. Korom (2000)	<i>Hinduism, ecology, cow lore, cultural materialism</i>	Lembu mempunyai hubungan signifikan dengan alam menyebabkan ianya perlu dipelihara. Kesan pengaruh doktrin <i>ahimsa</i> pada abad sebelum masihi. Pengaruh masa kini adalah kesan daripada doktrin yang dibawa oleh Mahatma Gandhi.
5	Deryck O. Lodrick (2005)	<i>Sacred cow concept, South Asia</i>	Bangsa Aryan mula meletakkan lembu sebagai binatang yang mempunyai kedudukan tinggi bagi golongan kasta atasan dan kemudian kedudukan tersebut diperkukuhkan lagi dengan doktrin Ahimsa. Penyucian lembu dikaitkan dengan tiga faktor utama iaitu agama, ekonomi dan politik.

3.0 Perbincangan

Hasil daripada pencarian melalui kaedah literatur sistematik menunjukkan terdapat tiga faktor utama lembu disucikan dalam ajaran Hindu iaitu faktor keagamaan, ekonomi dan politik. Permulaan penyucian lembu dalam ajaran Hindu bermula daripada kedudukan lembu yang disebutkan dalam kitab Veda yang dikarang oleh pendeta Aryan daripada kalangan kasta Brahman pada sekitar tahun 1300SM (Kennedy, Uttara et al. 2018).

Lembu dan kerbau banyak disebut di dalam kitab Veda berbanding dengan haiwan-haiwan lain. Hal ini menunjukkan lembu mempunyai kedudukan yang istimewa dalam kalangan penganut Hindu ketika itu. Kitab Veda menunjukkan bagaimana lembu merupakan haiwan sembelihan (Veda 8.43.11) yang digunakan untuk tujuan korban. Ianya dianggap sebagai pengorbanan yang tinggi nilainya. Dalam fasa Veda, amalan korban merupakan ritual asas dalam kepercayaan mereka. Daging lembu juga dimakan dan dihidangkan kepada

golongan yang berstatus tinggi sahaja yang menunjukkan lembu mempunyai nilai yang tinggi berbanding dengan haiwan-haiwan lain. Hasil tenusu lembu juga digunakan dalam ritual-ritual keagamaan dan digunakan sebagai sembah kepada dewa-dewa mereka. Tambahan lagi, pada zaman akhir Veda, najis dan susu lemak lembu dianggap sebagai bahan yang dapat menyucikan jiwa seseorang (Simoons 1974).

Lembu diangkat bukan sahaja sebagai simbol keagamaan ketika zaman Veda, namun ianya juga dianggap sebagai simbol kekayaan. Pengembala yang mempunyai ternakan lembu yang banyak dianggap sebagai orang yang berharta. Oleh itu, kepemilikan lembu berkait rapat dengan sosio-ekonomi masyarakat Hindu pada waktu Veda (Schwabe 1978). Sebahagian pengkaji menyimpulkan larangan menyembelih lembu dalam Rig Veda dan Atharva Veda menunjukkan konsep kesucian lembu pada zaman Veda. Namun begitu, terdapat juga pengkaji yang mendapati kesucian lembu ketika itu bukanlah terletak pada kepercayaan penganut Hindu akan tetapi lembu yang dianggap suci dan tidak boleh disakiti hanyalah yang dimiliki oleh golongan Brahman sahaja sebagai simbol kemuliaan kasta mereka (Brown 1957). Hal ini menunjukkan lembu pada zaman Veda dianggap sebagai simbol kekayaan dan kemuliaan kasta Brahmin di mana kepemilikan lembu dianggap sebagai harta yang paling berharga.

Selain daripada zaman Veda, kepercayaan terhadap kesucian lembu ini juga dikaitkan dengan konsep ahimsa iaitu kepercayaan yang berasal daripada agama Jain dan Buddha. Doktrin ahimsa melarang penganutnya membunuh sebarang makhluk yang hidup termasuk serangga kecil serta hama kerana ianya dianggap sebagai satu praktis yang menzalimi kehidupan. Pendeta-pendeta Jain mengelakkan diri daripada membunuh sebarang haiwan yang hidup dengan memakai pelitup muka serta menyapu jalan yang mereka lalu agar serangga yang dipijak oleh mereka. Doktrin ini muncul pada abad 4SM dengan lahirnya ajaran Jain yang merupakan pencetus kepada ajaran Buddha yang lahir selepas itu. Kepercayaan Hindu terpengaruh dengan kepercayaan Jain yang akhirnya menyebabkan masyarakat Hindu mula untuk tidak membunuh lembu. Namun begitu, haiwan lain seperti kambing dan ayam sebagai sumber makanan masih tetap disembelih oleh penganut Hindu. Doktrin ahimsa yang diambil daripada Jain hanya merupakan sebagai doktrin yang mendokong kepercayaan mereka terhadap kesucian lembu (Lodrick 2005).

Doktrin ahimsa pada awalnya tidak diterima secara langsung oleh penganut Hindu, malahan doktrin ini pada asalnya menentang amalan korban yang dilakukan pada zaman Veda (Weber 1958). Dengan mendokong doktrin ahimsa, golongan Kshatriya secara tidak langsung dapat mengurangkan pengaruh golongan Brahmin daripada mendominasi. Walaupun doktrin ahimsa telah lama dimaklumi oleh masyarakat India namun ia memakan masa yang agak lama untuk diterima sebagai satu kepercayaan yang diterima dalam aliran arus perdana. Teks-teks klasik menunjukkan hanya pada sekitar 5SM hingga 4SM ianya mula diterima dalam kalangan golongan Brahmin. Contohnya dalam Bhagavad Gita perkataan ahimsa disebutkan sebanyak empat kali namun ianya tidak diterangkan secara khusus dan amalan menyembelih lembu dan memakan daging lembu masih diamalkan oleh penduduk India (Lodrick 2005). Menurut Jha (2002), walaupun doktrin ahimsa ini dicatatkan dalam teks-teks Hindu, namun ianya mendapat penentangan daripada masyarakat kerana sememangnya pemakanan daging lembu merupakan sebahagian tradisi masyarakat India.

Lembu menduduki kedudukan penting dalam ekonomi pertanian India. Dengan pengukuhan pertanian dan kepadatan penduduk India yang semakin meningkat, kekurangan bilangan lembu menjadi faktor penghalang utama terhadap pembangunan ekonomi dan mengancam ketersediaan haiwan bajak kepada para petani (J. Hsu, Minna. 2012). Lembu dianggap sebagai penggerak ekonomi di India disebabkan fungsinya yang pelbagai seperti sebagai alat bajak, produk tenusu, lemak, dan sebagainya.

Harris Marvin seorang ahli antropologi teoritis paling kontroversial abad ke-20 memberikan teori mengenai kesucian lembu. "India's sacred cow" oleh Marvin Harris menyatakan penggunaan agama, sosial, dan bahkan praktikal lembu, memperkuat keyakinan orang India terhadap kesucian haiwan peliharaan. Menurut beliau, lembu adalah haiwan suci dan tidak boleh disembelih bagi masyarakat Hindu. Lembu adalah sumber penting dalam menghasilkan susu dan produk tenusu yang lain dalam masyarakat Hindu. Lembu digunakan untuk menarik pembajak dalam pertanian, susu lembu untuk diminum, kotoran lembu boleh dijadikan baja dan bahan api memasak serta menjadi sumber tenaga yang penting, dan tanduknya digunakan dalam industri kulit. Lembu juga dijadikan sebagai binatang utama dalam masyarakat Hindu kerana membolehkan banyak manfaat disamping pengeluaran kos penjagaan dan perbelanjaan ekonomi yang minimum serta sedikit. Lembu tidak perlu disediakan makanan yang susah oleh sebab lembu hanya memakan rumput, tidak memerlukan masa dan tenaga yang banyak untuk menjaganya, dan lembu tidak perlu disediakan tempat tinggal seperti manusia (Harris Marvin, 1987).

Penyucian lembu dalam dunia moden bermula ketika kerajaan Islam memasuki India yang berlaku pada abad 8M. Masyarakat Hindu cuba untuk membezakan mereka daripada masyarakat Islam. Penyucian lembu diangkat menjadi satu doktrin dalam Hindu bagi membangkitkan semangat nasionalisme Hindu (Doniger, 2017).

Gandhi jelas menganggap lembu sebagai ibu kepada alam kerana manfaatnya yang diberikan kepada manusia. Lembu juga dianggap sebagai haiwan yang banyak membantu sosio-ekonomi zaman Hindu kuno di mana lembu digunakan sebagai haiwan yang membuat kerja-kerja pembajakan. Lembu dianggap sebagai pemangkin kepada ekonomi masyarakat Hindu. Mahatma Gandhi pernah menyebutkan,

Mother cow is in many ways better than the mother who gave us birth. Our mother gives us milk for a couple of years and then expects us to serve her when we grow up. Mother cow expects from us nothing but grass and grain. Our mother often falls ill and expects service from us. Mother cow rarely falls ill. Here is an unbroken record of service, which does not end with her death. Our mother, when she dies, means expenses of burial or cremation. Mother cow is as useful dead as when she is alive. We can make use of every part of her body-her flesh, her bones, her intestines, her horns and her skin. Well, I say this not to disparage the mother who gives us birth, but in order to show you the substantial reasons for my worshipping the cow (R. K. Prabhu & U. R. Rao, 1960).

Hal ini jelas menunjukkan bagaimana penyucian lembu pada zaman Mahatma Gandhi disebar luaskan melalui kenyataan-kenyataan beliau yang menegaskan akan kesucian lembu. Antara penulisan beliau ada menyebutkan:

The central fact of Hinduism is cow protection. MM-388
Cow preservation is an article of faith in Hinduism. T-3-290

Merujuk kepada kenyataan di atas, ianya jelas menunjukkan bagaimana Mahatma Gandhi merupakan antara peneraju utama dalam meletakkan kepercayaan terhadap lembu sebagai antara kepercayaan penting dalam agama Hindu sehingga menyebabkan pengagungan terhadap lembu menjadi intipati keyakinan penganut Hindu (Parikh, Aparna & Miller, Clara. 2019). Perjuangan Mahatma Gandhi dalam meletakkan kedudukan lembu pada tahap yang diagungkan adalah jelas dalam kenyataan beliau:

“I worship it and I shall defend its worship against the whole world.” (R. K. Prabhu & U. R. Rao, 1960).

Kesimpulannya, faktor penyucian lembu dapat dilihat menerusi tiga aspek utama yang bermula dengan doktrin ahimsa kemudian diikuti dengan faktor ekonomi di mana lembu diangkat sebagai haiwan yang mempunyai banyak manfaat dan jasa kepada manusia sehingga menyebabkan daging lembu perlu dipelihara bagi memastikan kelestarian alam. Hal ini dikaitkan juga dengan mitos-mitos agama Hindu yang mengaitkan lembu dengan dewa-dewa dan sehingga kini ianya menjadi pegangan sentral dalam agama Hindu yang menganggap lembu sebagai setaraf dengan dewa. Daripada aspek politik pula, penyucian lembu dapat dilihat bermula daripada zaman Mahatma Gandhi yang meletakkan kepercayaan kepada kesucian lembu sebagai kepercayaan utama dalam ajaran Hindu bagi meningkatkan semangat nasionalisme Hindu dan sehingga kini ianya dijadikan agenda utama dalam percaturan politik di India.

4.0 Kesimpulan

Secara kesimpulan, penyucian lembu bertitik tolak daripada doktrin ahimsa yang kemudiannya digunakan sebagai asas dalam menolak ritual korban dan penyembelihan lembu dan seterusnya melarang memakan daging lembu dalam kalangan masyarakat Hindu. Kedudukan lembu seterusnya diangkat menjadi haiwan suci yang disamakan tarafnya dengan dewa-dewa Hindu dan mendapat tempat yang istimewa apabila bahagian-bahagian lembu seperti susu, minyak sapi, air kencing dan najisnya digunakan dalam upacara ritual keagamaan Hindu. Oleh kerana manfaatnya yang banyak dan keterkaitannya dengan ekonomi masyarakat Hindu, pengharaman lembu menjadi berleluasa dan dimaklumi oleh majoriti penganut Hindu dan ianya dianggap sebagai kepercayaan sentral dalam ajaran Hindu seperti yang dibawa oleh Mahatma Gandhi. Lembu dianggap suci kerana ianya dianggap sebagai wahana dan haiwan kesayangan dewa-dewa Hindu dan akhir sekali lembu diangkat sebagai simbol nasionalisme Hindu. Tuntasnya, kedudukan lembu yang dianggap sebagai dewa menjadikan lembu haiwan yang sangat diagungkan dan dihormati dalam kalangan penganut Hindu.

Rujukan

Batra, S. 1981. *Cows and Cow-Slaughter in India: Religious, Political and Social Aspects*. Institute of Social Studies: The Hague, The Netherlands. 1-50.

- Brown, W. N. 1957. The Sanctity of the Cow in Hinduism. *The Madras University Journal*. 28: 29-49
- Doniger, Wendy. 2017. Hinduism and its complicated history with cows. The Conversation. theconversation.com/Hinduism-and-its-complicated-history-with-cows-and-people-who-eat-them-80586)
- Harris Marvin. 1987. *The Sacred Cow and the Abominable Pig: Riddles of Food and Culture*. New York: Simon & Schuster.
- J. Hsu, Minna. 2012. The Significance of Cows in Indian Society Between Sacredness and Economy. *Anthropological Notebooks*. 18 (3). 5-12
- Jha, D. N. 2002. *The Myth of Holy Cow*. New Delhi: Matrix Book.
- Kennedy, Uttara et al. 2018. The Sheltering of Unwanted Cattle, Experiences in India and Implications for Cattle Industries Elsewhere. *Animals*. 8 (64).
- Korom, Frank J. 2000. Holy Cow! The Apoteosis of Zebu, or Why the Cow is Scared in Hinduism. *Asian Folklore Studies*. 59. 181-203
- Lodrick, Deryck O. 2005. Symbol and Sustenance: Cattle in South Asian Culture. *Dialectical Anthropology*. 29: 61-84
- Parikh, Aparna & Miller, Clara. 2019. Holy Cow! Beef Ban, Politocal Technologies, and Brahmanical Supremacy in Modi's India. *An International Journal for Critical Geographies*. 18 (4). 835-874
- Schwabe, Calvin W. 1978. Holy Cow Provider or Prasite? A Problem for Humanists. *Southern Humanities Review*. 13 (3). 251-278
- Simoons, Federick J. 1973. The Scared Cow and The Constitution of India. *Ecology of Food and Nutrition*. 2(4):281-295
- Stephen K. Sanderson, 2011 "Topik Khusus: Lembu yang Suci dan Babi yang Menjijikkan", dalam *Makrososiologi* (edisi kedua) (terj.). Jakarta: RajaGrafindo Persada
- Weber, M. 1958. *The Religion of India: The Sociology of Hinduism and Buddhism*. Translated and edited by Hans H. Gerth. London: Verso
- Xiao, Yu & Watson, Maria. 2017. Guidance on Conducting a Systematic Literature Review. *Journal of Planning Education and Research*. 1-20